

湧

幢

小

品

溪幢小品目錄卷之三十一

鶴 二則

羣鵲招鶴 二則

燕巢

鳥之屬 二十六則

鳥田

白鹿 三則

異獸

獅象 二則

犬 七則

虎 十一則

牛

生善道

兩牧犢相衛

相牛法

牛禁 二則

猴

猫

豕

獸之屬

十八則

龍

十三則

龍鳳名狀

三則

猪龍

龜

三則

蛇

六則

毒食

三則

魚

五則

氷井魚

神魚

進鮮

雜物

五則

蛎蚪

物理

五則

湧幢小品卷之三十一

湖上朱國禎輯

鶴

楊子曰鶴羽族晉也而變小大不同金九火也而變生焉七年一小變十六年再變百六十年大變千六百年變極而與聖人同隱顯晉其至矣

陳州倅盧某畜二鶴甚馴一創死一哀鳴不食盧勉飼之乃就食一旦鳴繞盧側盧曰爾欲去耶有
天可飛有林可棲不爾羈也鶴振翮雲際數四徊

翔乃去盧老病無子後三年歸臥黃蒲溪上晚秋
蕭索曳杖林間忽有一鶴盤空鳴聲淒斷盧仰祝
曰若非我陳州侶耶果爾卽當下鶴竟投入懷中
以喙牽衣旋舞不釋盧撫之泣曰我老無血胤形
悲影吊爾幸畱者當如孤山逋老共此殘年遂引
之歸爲寫溪塘泣鶴圖中繪已像置一鶴其傍後
盧歿鶴亦不食死家人瘞之墓左

羣鵲詔鵲

宋氏園亭中有古樹鵲巢其上伏卵將雛一日二

鵲徊翔屋上悲鳴不已頃之有數鵲相向鳴漸益
近百首皆向巢忽數鵲對喙鳴若相語狀颺去少
頃一鵲橫空來閣閣有聲鵲亦尾其後羣鵲向而
噪若有所訴鵲復作聲若允所請瞥而上擣巢啣
一赤蛇吞之羣鵲喧舞若慶且謝者蓋鵲招鵲搏
蛇相救也

徐司訓觀宅近啓聖祠縱奴射鵲合邑之鵲無不
帶箭者一日鵲銜火焚祠有鵲數百盤旋烈燄之
傍若快心者徐坐焚祠去官奴亦瘖啞事在世

宗初年

燕巢

宋時湍青一民家燕巢累年增廣至三尺燕雛旣
飛忽一旦野禽來集庭除甚衆驅之不去已而巢
破有白鳳雛長三尺餘徃西南飛去諸禽皆駭散
其家亦墮

鳥之屬

鳥之孝者名曰戴鵲

衆鳥雄大雌小惟鵲反是

衆鳥三指向前一指向後鸚鵡兩指向後

取鳥之未生毛者以丹和牛肉使吞至長羽毛皆紅今之紅鸚鵡或此類也

鳥鵲之掌縮於腹下

鳥之雌雄別其翼右掩左者雄左掩右者雌

雲南百夷中產黃鸚鵡永樂中常貢此金文靖有黃鸚鵡賦成化間海南進紅鸚鵡朱永翠裳沈啓南見而圖焉

隆萬間緬甸有鳥四足而肉翅其大如鵝其鳴似

鶴能飛而不能遠其雛胎生飛行則負雛于背不踐稼穡不食生蟲殺之必見不祥

北方有慈烏狀似大鷄善啄物見牛馬橐駝脊間有瘡輒啄而食之往往致死若饑不得食雖砂石亦食焉虜人呼爲活羅

禿鶩似鶴而大高八尺善與人鬪尤好啖蛇萬曆壬辰春武寧山中有大鳥高七八尺似鶴而蒼頂禿無毛其喙有觚稜七八痕所在之處無物不啖魚鳥爲之一空蓋禿鶩也

蜀中山谷間有一種百舌鳥毛采翠碧蜀人多蓄
之一名翠碧鳥善效他禽語凡數十種非東方所
謂百舌也往往矜鬬至死不解桂林有鳥鳳如鵲
而紺碧髮頭有冠尾垂二弱骨各長一尺四五寸
其末始有毛羽大略如鳳鳴聲清越又能爲百蟲
之音生左右江谿洞中澤州產石英處有鷄如雉
體熱無毛腹下毛赤飛翔不遠常食碎石英

廣西有山鳳狀如鵝而鳳喙巢兩江深林中雌伏
卵時雄以木枝雜桃膠封其巢僅畱一竅取食子

成卽發封不成則窒其竅而殺之又有大頭鳳飛則羽聲響若轉輪所止之處百鳥不敢鳴

皂雕一產三卵內有一卵爲犬子灰色短尾隨母景而走所逐之禽無不獲者陶九成云北方凡皂雕作巢處官司必窮探之如一巢而三卵者其一必狗也取以飼養進之于朝但尾上多毛羽數莖而已田獵之際雕則戾天狗則走陸所逐伺至名曰鷹背

海鵠神俊善辟蛟螭鄴城鎮將得而寶愛之南

紋常爲害持鷄往忽投陂水中攫一小蛟出食之
且盡

新寧縣有鳥其大如鵠其色蒼其鳴自呼曰獨足
獨足云

東海有鳥文身赤口而一足唯食蟲多不害稻梁
其鳴如人嘯聲晝伏夜翔或時晝出則羣鳥譟之
俗名觸觸或曰山譟疑卽商羊也

木客鳥大如鵲千百爲羣飛集有度俗呼其黃白
色有翼有綬飛獨高者爲君長居前正赤者爲五

伯正黑者爲鈴下細色雜赤者爲功曹左脇有白帶者爲主簿各有章色廬郡東多有之

越王鳥出新州似鳬而勾喙喙中可受二升南人以爲酒卮此鳥不踐地不飲江湖不啖百草蟲魚唯啖木葉糞似薰陸香可治雜瘡

山經言鵲鳥如梟人面四目而有耳見則大旱萬曆壬辰七月初豫章城中此鳥來集永寧寺屋上高二尺許燕雀從而羣譟之其年五月晦至七月中酷暑無雨田禾盡枯

鷺萱錄號碧繼翁陸龜蒙號絲禽三輔黃圖號屬
玉東坡詩號雪衣兒所稱不同皆言其白性畏露
畜之雖馴至白露必飛揚而去

烏鼠同穴其烏爲餘其鼠爲鼯今咸陽有烏鼠山
唐詩中徃徃及之

成都福州貴陽省下多梟各府亦如之無一夕不
聞梟聲成都學道署栢樹叅天上有梟巢在事者
伐其巢得九子福州下令獻一梟賞三十文無日
無獻者貴陽用烏鏡驚之其聲稍遠然鏡聲昔昔

不絕宜其地者初至甚惡之竟亦未必爲殃蓋多則不足恠也

紫荊山無翡翠或移置其中輒飛去汴梁城內無螢火無蟬聲太湖洞庭山無虎無蛇無雉雁宕山無荊棘有虎不傷人

史載昌邑王求長鳴雞夫雞安得有長鳴者滇志雲南鎮沅州有雞形矮小鳴無晝夜與中國雞聲異得非長鳴雞耶

漢時公膳日食雙雞庖人竊易之以鶩因此知雞

貴而鶩賤雖然日食雙鶩而易之雞不又曰鶩貴雞賤耶

工部徐謐興化縣人畜一天鶩徐有往鶩必從之或入朝則鶩盤旋雲漢候退朝乃飛下人以鶩卜其去住家有亭曰問鶩又同縣鮑氏鴈媒飛去年許矣忽聞網中鴈聲主人驚曰此吾家老黑頭來也合網得之則見鴈媒將羣雛俱麗網中不怖不驚而足銅環宛然

鳥田

吳越春秋禹崩之後天美禹德而勞其功使百鳥
還爲民田大小有差進退有行一盛一衰往來有
常地理志山上有禹井禹祠下有羣鳥耘田水經
注鳥爲之耘春拔草根秋啄其穢是以縣官禁民
不得妄害此鳥犯則刑無赦

白鹿

世廟末年進白鹿甚多胡梅林在浙獲而進者二一
齊雲山一舟山舟山在海中不甚深邃亦產此異
矣蓋天生以應世主之求不在山之淺深也

萬曆戊申七月望日嵩山馬峪居民獲一小白鹿
通身如雪月晴周圍如丹砂而瞳子如漆獻于縣
官畜之凡二年角將生遂縱于玉柱峰之下踰月
中使來求之不得乃已抱朴子曰鹿千歲白五百
歲黃此一說也今幼鹿而角漸露可見又有奇生
別種不可以歲年論也

張魴字叔魚江曲人有學行晉明帝時爲合浦令
英敏有惠政白鹿羣遊因魴所築城及南山皆以
白鹿名志奇政也因取一以獻詔徵爲尚書郎夫

白鹿稱瑞而至于羣遊則又千古所少晉史中多載奇異小說而獨此不載何耶

異獸

永樂己亥秋海外忽斯漢等國各遣使來進麒麟

獅子天馬文豹紫象

馳高七尺

福鹿

似鹿而花文可愛

靈羊

長角馬哈獸

角長于身

五色鸚鵡

又交趾進白鳥山鳳

三尾龜

獅象

成化十九年西域諸國若速檀阿里黑麻王偕遣使

以方物來貢有獅子牝牡各一雄姿詭狀世罕曾睹西漢書謂獅子似虎正黃有髯彤尾端茸毛大如斗與今所貢正同而楚書謂有青綠色及五色備者蓋不常有或夸言也軒轅紀帝登黃山于海得白澤神獸能言語達于萬物之情穆天子傳後猊日行五百里爾雅猊猊類彪猶食虎豹世謂白澤俊猊皆卽獅子耳

豕豕類也張腹而無畢露者也今人讀豕曰畢世而不知其義可乎

犬

李明道豐城人家富于貲乘亂起兵附徐壽輝後
附陳友諒及見獲于胡大海太祖宥之命爲行
省叅政令與曾萬中等守吉安兩人不相能明道
復叛附于友諒及友諒敗滅明道復走歸豐城剪
其鬚髮逃匿武寧山中有茶客識之縛送武昌
上數其反覆之罪明道無以對遂磔于鮎魚口沙上
明道嘗有所畜犬爲我軍所得攜至武昌犬見明
道被磔嗥鳴躑躅不已啣聚其肉跑沙瘞之上

義此犬因命斂葬明道

秦邦者家饒好貨殖永樂初年已四十將往京師
卜之不利妻許氏苦諫不聽邦畜一白犬相隨出
入甚有靈性是日解纜犬忽呼號躑躅躍入舟中
呌邦衣裾若阻行者邦不悟遂挈之偕行舟次張
灣有寇登舟俱被刺歿于水惟白犬從後艙躍出
嚙一盜手幾殞衆持刃來逐犬赴水遁賊旣去犬
潛尾到家默認其處晝則覓食夜伏水次守邦如
是數月人皆異之未幾巡河御史呂希望至見白

犬號呼岸傍狀如泣訴異之曰此必有冤命吏卒
從犬足爬地果見邦屍犬嗥叫屍傍不去希望曰
此必故主被謀害但不知兇人何在犬能指其處
乎犬搖首遂行命吏隨之里許至一室賊方會飲
犬徑入嚙之吏縛賊至拷掠未服忽一人啼而前
訴曰某乃秦邦僕也吾主被刼歿某亦被刺落水
幸而不死此屍卽吾主也賊遂伏罪其僕昇主柩
還犬亦隨到家晝夜踰伏柩側時或悲號葬甫畢
犬觸樹而死許氏義之埋犬塚傍許氏守節終身

被旌

王日就字成德分水縣人少負俠氣夜獵從騎四
出有畜犬鳴嗚啣衣捶之不却且道且前怪之亟
隨以歸明日覆視其處虎跡縱橫歎曰犬人畜也
猶知愛主吾奉父母遺體不自愛可乎散其徒讀
書中年傳家政于子堅坐二十餘年淳熙元年年
六十五正衣冠泊然而逝

殺狗磔縣四門起于秦德公益狗別賓主善守禦
故以爲禳以辟盜賊月令曰犬者金屬抑金以畢

春氣使不爲害令萬物遂成其性今惟夷狄行之
中國則否

狗後有懸爪者曰犬善警苟食故目人之卑污者
曰狗古者有田犬有吠犬有食犬記曰士無故不
殺犬豕指食犬也

江口備倭官宋儒畜一黑犬至夜輒踰出或竊隣
肉以歸隣患之訴於儒儒因伺之良是售之狗屠
得百錢旦日啓扉犬已逃至搖尾就儒作乞憐狀
儒與犬約自後勿復竊隣肉則貸汝一死仍以原

錢歸屠犬卽彌耳馴伏投以骨一嗅輒去甘守糲
覈見者咸歎異云

余氏有老僕畜一犬甚猛僕怪其嚙人每欲殺之
犬輒遁去異日復還嚙人如故也後竟殺之犬忽
憑僕之妻佯狂而啼具言我前身獵徒也再世爲
秀才今爲犬後身將復爲人我無罪何妄殺我始
我匿竹中數日謂汝意已解故復來歸汝竟殺我
我何罪耶啼數日尋愈後亦無恙

虎

昔有人北試道經彭城過鄉落間見一義虎橋詢諸父老曰昔有商於齊魯之墟者夜歸迷失故道悞墮虎穴自分必死虎熟視不加噬晝則出取物食之夜歸若爲之護者月餘其人稍諳虎性乃囑之曰吾因失道至此幸君惠我不及于難吾有父母妻子久客于外思欲一見仗君力能置我于大道中幸甚虎作許諾狀伏地搖尾招之商喻其意上虎背躍而出置諸道旁顧而悲跳分去後歷數載商偶經此地見諸獵縛一生虎歸將獻之官熟

視乃前虎也虎見之回視其人感泣遂與衆共道所以亟出重貲贖之衆亦義其所爲相與釋縛縱深山之曲後人於其地爲橋表焉

長興臧進士隣人薄暮爲虎所嚙聞空中呼曰業畜莫轉牙背而行如風雨聲天明拋一大寺前僧百餘曝朝曦補衲問之曰天台方廣寺也旁店老婦人傍端立一子可五六歲見而招之曰汝久飢當以粥啖汝泣拜謝之因謂曰吾已無夫止一子肯畱否又拜泣告以思家不能開笑曰去此不知

幾千萬里家豈可到遂大哭求死老婦沉吟曰當
令吾子送歸第命合眼隨而行風雨聲如前久之
喝曰已到看看其子忽不見時夜半月明識其家
扣門妻子兄弟皆以爲鬼不敢應比明人也乃抱
而慟哭慶更生時離家已念餘日矣其人至今尚
存

處州蔣姓者善殺虎人問其故答曰百獸難殺惟
虎易殺蓋它獸見人奔走逐之或不能及虎恃勇
見人負嵎振威磨牙掉尾欲撲人而食之吾得鐵

又對虎中立二人執鎗旁佐之叱虎令前徐以叉
接其項二鎗夾進折而仆之無難者使其見人卽
走吾烏能盡得志可爲好食人者之戒世有猛而
貪得者殆此之類也

正德十年中秋清河縣有虎自梁山而來踰城入
察院升大槐枝顛眈眈下視咆哮甚厲知縣張綸
用壯民李萬等搏殺焉

小說中力士尤昌四殺虎以鐵鎗爲弱削堅竹炙
以油未畢而虎至兩手執其膊一手擎定一手取

竹刺殺之其說未知果否而要之竹刺之可用明
矣丁巳杭州有虎入城營軍三百尾之出錢塘門
將官多力者持鎗進輒被拉斷一醫生見而笑之
衆因就問請計醫士取鎗疊試皆曰輒不可用亦
削竹如前法刺虎中之按竹奮臂覆轉虎亦隨轉
就斃蓋難不在刺而在轉轉時鐵鎗都折折則虎
奮臂能脫鎗傷人惟竹勁不可折得施全力故也
醫士又云凡虎蹲定不肯去作咆哮聲攫拿勢者
一人以鐵叉直立俟之虎跳而撲中口二人持棍

擊其腰可以立斃其曳尾前行不睨人而睨地目光反照見人緩急因之行止又不作聲勢此殆有神未可易視蓋虎性燥烈聲勢可畏能怖人却亦易竭可擒惟沉沉迤邐無所戀不作聲勢固自難制少年在處州山中曾見其一獵士數百人隨之一人援矛而前虎反躍嚙其項棄之直衝而馳仆地者十餘人有死者竟越山去

徐恩山陰人家貧不甚知書而孝友出天性與兄文刈薪項里嶺日未午一虎從叢篠中出噬豕牙

貫肩項恩急顧得一木栝趨擊虎數十下持不可
奪則躡文足自後擇之虎乃釋文走恩度必復來
于是曳文首前向立跨屍以待且大呼曰天乎吾
于虎何讐虎殺吾兄天尚相與殺此虎復兄讐少
選虎迂行負上勢奔突而下恩側身承勢橫扼而
擠之虎輒失足旁逸若是者凡數四鄰族聞者或
匿林薄間呼恩棄屍自脫恩厲聲曰汝能助助我
不能無撓我今日斷無棄兄理我不與虎俱生矣
虎欲騁不得復奔突如前垂至則人立不動亦若

出奇設疑意在乘間以逞者恩直前批之適中其鼻虎創甚始却步徐行而去然猶數回視焉旣而救者咸至共輿尸以歸恩力竭病累月死方恩病時人有以義士譽之者恩愴然涕曰吾恨力止此不能殛此虎以祭吾兄吾乃以是得衆人譽吾獨何心哉邑大夫蕭鳴鳳傳其事而爲之贊

何兆三山陰人弟出採薪虎突至銜其首兆三呼號奔救以篠擊虎虎遽舍之去弟乃得生兄弟爲樵十餘年稍有所儲兆三曰我老矣當爲弟娶以

延宗祀若有子卽吾子也于是弟遂娶生子而弟死弟婦悍不能奉事其伯兆三不免凍餓亦無悔云

曹小娥黃巖人嘉熙二年二月晦同其母范及鄰居二十人採筍陸婆坑范爲虎所得衆悉驚潰娥執母手推虎而叫范知不免瞽瞍然命之去娥叫執愈疾亟行數百步虎掉尾拂娥踞坐熟視娥以身翼母推之下山尚喘息會救者至以布衾裹歸母死而屍得完里人弔之娥不能言徐曰黃虎也

吾不得代吾母死也

夏孝女少字阿九亦黃巖人時年十五一日隨父與其鄰樵于山父前與虎遇鄰人懼亟升木避之女見父陷虎口噉號直前執薪鞭虎且鞭且泣踰十步虎棄其父而啖之

餘杭方祥買山于古城山主朱氏既畢事朱復誣謂未受直與其徒三人邀議于山舍方弗校詎更與之第指天矢之曰吾苟負若出門卽死于虎若負吾當亦如之朱出門上馬已覺體戰栗轉顧虎

突來攫其騎啞其臂方奮呼舉火燎虎虎乃釋去
朱以緼著厚得不死乃自訟而語諸人方又一日
黎明凌霜過潘版橋橋布木狹而修下瞰湍流甚
險行將半見彼岸縞衣偉男子大言梁斷矣勿過
因卽返候明桴而渡視梁果斷霜路無偉人跡意
村叟也訪謝之通村無此人而旁有周赧王祠疑
神助每過必入拜焉

神考某年夢有豹掉尾來嚙惡之令豹房絕食俱餓
死獸亦遭阨至驚動 聖天子也

牛

齊河縣洪店有盜殺人于王臻戶前衆執臻已誣服久矣知縣趙清過洪店一牛奔清前跪而悲鳴若有所訴清曰誰氏之牛衆曰王臻牛也清曰臻其有冤乎抵邑卽辯釋臻父子後鞠大盜王山得其殺人狀齊河人稱神明作義牛記清代州人成化癸卯鄉薦

生善道

平陽縣初築垂楊埭屢築屢圯官用巫者言將以

牛祭時有了興法師在萬泉鄉牛徑脚刀奔至師前逐者踵至師止其殺解袈裟付之曰若以置埭址下埭自可固慎勿用牛已而果然牛放山中師建塔院咒牛曰汝能練泥乎牛俛首受役塔成七日而牛死師曰此牛已生善道矣瘞之有香氣觸人十餘日不散

兩牧犢相衛

程史有牧犢相衛得免虎患 太祖御制文集稱滁陽亦有此事唐時劉彙爲歙州刺史野媼將爲

虎噬幼女號呼搏虎俱免

相牛法

古之視牛者以耳病則耳燥安則溫潤而澤詩云爾牛來思其耳濕濕是也舊又云牛相壁堂欲闢膺廷欲廣豪筋欲就雋骨欲垂插頸欲高排脇欲密尾不用至地頭不用多肉角欲得細身欲得圓眼欲得大口方易飼鼻廣易牽倚欲如絆馬行欲如羊形欲如卷懸蹄欲如八字亂踈好觸龍頸突目好跳毛拳角冷有病毛少骨多有力岐胡有壽

常有似鳴有黃嘉泰志中州烝潼取酥酪以雍酥
爲冠晉王武子指羊酪示陸士衡云卿江東何以
敵此疑當時南方尚未有也

牛禁

宣武門外多回夷聚居世以宰牛爲業巡城楊御
史四知榜禁之衆皆鼓譟諸大臣知狀弛其禁乃
定此戊子年事蓋禁殺牛自美事而京師不可行
想各邊亦當然

韓滉以賊非牛酒不嘯結乃禁屠牛以絕其謀犯

令者誅及鄰伍混特禁屠以盜賊爲名可重其罰
此機變也

猴

汪中丞可受黃梅人嘗令金華有丐者作猴戲乞
錢遂飽所欲有一丐者忌且羨之因醉丐者以酒
誘至破窰內椎殺之繩其猴從已亦作戲乞錢而
汪呼導聲至猴忽嚙繩斷脫走車前作訴冤狀卽
令人隨之至破窰內得屍又令人行捕得後丐者
鞠問伏辜杖之歿方焚前丐者屍烈焰始發猴又

號鳴赴火抱屍共爲煨燼

猫

姑蘇齊門外陸墓一小民負官租出避家獨一猫
催租者持去賣之閭門舖商忽小民過其地躍入
懷爲舖中所奪輒悲鳴顧視不已至夜啣一綾襖
內有金五兩餘投之而去

豕

萬曆初許墅閻王序三家養一豕忽啣王衣裙行
異之隨所往以嘴掀土出瘞金千兩家遂大饒自

是飼豕以飯澡以泉衣綿簾毳凡十年大可此牛
遠近皆來觀稱其家金爲豕金

獸之屬

凡獸自虎豺而外久馳則血耗而肉不佳鹿爲尤
甚

山中夜靜時無雜獸之聲則必有虎虎去月餘而
後獸稍有至者山之居人以此爲驗
狢似虎而白無前兩足者

馬八尺爲駢牛七尺爲特羊六尺爲羝羝五尺爲

猓狗四尺爲獒雞三尺爲鶡此皆就絕大而高者
名也

梅聖俞有馬曰鐵獺王元之有奴曰青猿曲端有
馬曰鐵象

虎豹一躍六丈熊十二丈虎豹可擒熊雖追及圍
守亦不可擒蓋毛深而滑受射若飛沙著冰柱紛
紛墮地人旣難近鎗戟亦無所施

正德十年十二月麻城縣有熊飛過縣治獲之此
可證飛熊之說

猱似猿猱而長尾尾色紅去來林間如飛能食猿
猱猿猱每出采山核猱至莫不俯首帖服猱擇其
肥者噉之

邕宜以西南丹諸蠻皆居窮崖絕谷間有獸曰野
蠻黃髮椎髻跣足裹形上下山谷如飛猱自腰已
下有皮繫垂蓋膝若犢鼻力敵數壯夫遇男子必
負去求合或刺殺之至死以手護腰間剖視得印
方寸瑩若蒼玉字類符篆不可識

雲貴深山中產一種獸形類獼猴而白毛巢於高

樹之上其子孫以次巢下枝老者鮮出唯居下者
出覓果物傳致其上老者已食衆乃敢食名曰宗
彝尚書傳所謂虎虬也又有神鹿生而兩頭能食
毒草

西夏有竹牛重數百斤角甚長而黃黑相間用以
製弓尤健勁

遼東有駝鹿重三百斤彼人能效其聲致而取之
涼州狗大如驢漢樂浪郡有果下馬高三尺日南
郡出果下牛亦高三尺

松潘出六角羊土人云羊與鹿交故多角郭青螺
在蜀得二隻臨行以送周友山大叅周名思敬

猿山家謂之鞠侯皮陸俱有詩見山川志猿好踐
園蔬所過狼藉山間豆麥胡麻菜菔蔬果竹萌之
類多被殘天衣寺僧法聰令捕一老猴被以衣巾
多爲細縫使不得脫縱之使去老猴喜得脫逃跳
趨其羣羣望而畏之皆捨去老猴趨之愈急相逐
日行數十百里其害稍息

貓一名烏圓其目睛旦暮皆圓子午時卽斂如線

鼻極冷惟夏至一日煖蓋陰類其應若此
聲無膽兔無脾驚以眼聽

似馬而小者曰驢驢與馬相牝牡而生者曰騾尤
粗健能負物致遠

唐弘道初涼州倉有鼠長二尺餘爲貓所嚙羣鼠
數百少選聚萬餘鼠州發人擊之乃散

龍

大禹治水至震澤斬黑龍以祭天本朝永樂間大
獲龍骨吳江史鑑爲之志云

龍墳在今秀水縣復禮鄉小律原北距太湖可六
七十里初由村氓耕田往往得龍骨而未識也永
樂間有一漁者始識之因潛持出以售于蘇州南
濠徐氏藥肆中歲以爲常一日徐問有龍角否其
人曰有乃以一枝遺徐有朱永年過徐肆中見之
驚問得之何所曰適有人來售朱問其人去遠近
曰未遠因急追及之蓋是時有左璫號李黃子者
方受命求朱珍異朱以買辦戶出入璫所欲以
爲奇貨也遂偕其人告於璫璫檄郡縣調夫船具

畚鍤躬往掘之初入見有狀如浮屠氏所謂金剛神者數輩儼然如生衆方駭異及見風隨化盡惟餘骨爾遂得龍骨角齒牙凡數十艦獻于朝竊取者不與焉時方貴龍角帶自非諸王勲戚不能得一鎊直十餘金及是價爲之頓賤秀水在當時猶爲嘉興宣德間始分爲秀水今其田可六十畝許不加糞治而收穫倍于他田歲每大風雨則拔木發屋而禾稼反無損耕者猶時時得龍骨田中意當時已盡取不應有遺豈其地爲龍所窟而潛

疏其中歟至大禹治水至震澤斬黑龍以祭天之
文不知出于何書歷攷吳越春秋吳郡志蘇州志
無所經見不敢強爲之說

劉洞微善畫龍一日夫婦造門曰龍有雌雄不同
公知之乎曰不知其夫笑曰不知如何輕自下筆
洞微悵然曰子能言之乎曰能因請其狀曰雄者
角浪凹峭目深鼻豁鬚尖鱗密上壯下殺朱火燁
燁雌者角靡凹平目淺鼻直鬚圓鱗薄尾壯于腹
洞微曰爾何人能知之其人曰吾卽是也化爲二

龍飛去

陳容字公所長樂人端平二年進士官至朝散大夫善畫龍世稱所翁龍者是也

宋文帝以宜都王自江陵入卽臨江中有黑龍負舟人以爲瑞梁武陵王紀自成都率兵下峽亦有此異且江水初尚可揭及登舟無雨飄長六尺咸以天贊爲賀未幾敗死文帝亦終死于元兇之手瑞乃爲禍如此要知黑龍非瑞必如太禹神聖黃龍負舟乃始爲奇耳然禹視如蝦蟇原不以爲瑞

也

温州府樂清縣嶺店驛居民至七月二十日皆閉
戶不敢出其日必有風雨滿街積有蝦蟹相傳百
年前有女汲于河龍神見而悅之化爲男與交遂
有娠後生二小龍剖腹而出龍神卽攝女屍葬于
山頂蓋七月之二十日至今小龍以其日至若祭
墓然時刻不爽

嘉靖初揚州石壩集民家夜嘗有物竊甕冰咤人
每伺之不得一日黎明將秣馬遠行忽見中雷火

光燁燁欲騰而上主人急以田器擊之鏗然墜地
有聲視之金龍首大於五斗釜乃驚愕急以布數
十裹而瘞之精神畢出之赤金也身及尾皆銅錢
其家今富四紀無過稱金龍邵氏

嘉靖七年寶應知縣聞人訟慮時陽爲患奏開月
河試築記工方類地祇二龍戲水鱗角畢露時四
面皆大雨獨不及工所人咸異之

廣西左州模邗有岩牀入岩二十步卽幽暗中有
野龍潛伏邗婦欲見龍者則盛飾入岩唱土歌以

動之龍乃出蟠村婦懷中良久乃去士人遊觀則
龍伏不出

蔥嶺冬夏有雪又有毒龍若失其意則吐毒風雨
雪飛沙礫石遇此難者萬無一全

北庭西北沙州有黑河深可駕舟其水往往汎濫
蕩室廬壞禾稼人多遠徙開元中南陽張嵩爲都
護召吏訊其事云黑河中有巨龍嗜羔特大彘故
漂浪騰水望祀河滸乃命致牢醴布筵席密以弓
矢俟其側及至河上有龍長百尺自波中躍出俄

然昇岸漸近漸縮至於凡筵纔長數尺嵩發一矢
衆矢並集龍遂成焉上壯其果斷詔斷龍舌函以
賜嵩子孫且承襲沙州刺史

隆慶壬申睢寧大雨河溢有五龍見雲中雷火霹
靂鄉人言是日有龍爲蛛網所罣不得脫須臾火
龍焚其網龍乃脫去蛛死山中絲網尚彌山谷或
截取爲馬鞭

長阿含經云真龍十二種始不爲金翅鳥所食此
鳥頭尾相去八千由旬其目明利有大勢力投龍

宮中搏諸龍啖之其說荒唐不可信攷南齊太子
長懋與宗人西昌侯蕭鸞意好不協割竟陵王子
良曰我意中殊不喜此人當由其福薄故也太子
一日臥小殿中夢見金翅鳥飛下搏食小龍無數
後鸞顯政篡位太子子孫無遺焉鸞每先一夕焚
香嗚咽流涕則次日諸王必有誅殺大約煮藥以
待最幼者使保姆抱以入此鳥乃變爲帝王子族
類中行此忍心事忍而又嗚咽流涕則心固未嘗
死也總之自爲子孫計忍而至此要之終不得免

冤冤報復作業何所底止豈乘除固然然亦枉用
勢力矣

天地間水下注氣上升神龍出沒其間爲之宣洩
皆有神焉故所在龍池潭洞穴處處有之有神龍
則必有毒龍惟龍五臺山下有池約二畝餘佛經
云禁五百毒龍之所禁之中必有所以生而養之
法若殺便增出許多事來

龍鳳名狀

鹿角牛耳駝首鬼目蛇項蜃腹魚鱗虎掌鷹爪龍

之狀也鴻前麀後蛇頸魚尾鶴頸駕思龍文龜背
燕領雞喙五色備舉鳳之狀也麀首牛尾狼頭馬
足圓蹄肉角麟之狀也有角爲虬龍無角爲螭龍
有鱗爲蛟龍有翼爲應龍鳳之青曰鸞赤曰鵠黃
曰鵩白曰鶻紫曰鸞麟之青曰鸞孤赤曰炎駒白
曰素冥黑曰角端黃曰麒麟

龍之鱗八十有一鯉之鱗三十有六麟肉角而不
觸鳳肉啄而不啄鱗骨脆貌骨實蛟骨青鳳骨黑
龍珠在頷蛟珠在皮蛇之珠在口魚之珠在目蚌

之珠在腹鼈之珠在足螭目圓蛟眉連蜃鱗逆蛭
鼻反狼鴈直鵲喙曲獬羊之角重於肉斲木之舌
長於喙犀體兼五種肉象體具十二少肉或云有
百獸肉

神龍所經盆盎涌焉海犀所涉江河圻焉麒麟之
闕日月食焉鯨魚之死彗星出焉犴牛之搏海水
沸焉越睽殺犀疾雷及焉

猪龍

濮陽郡有續生者身長七八尺剪髮畱二三寸不

著禪袴破衫齊膝而已每四月八日市場戲處皆有續生郡人張孝恭疑之自在戲場對一續生又遣奴子到諸處凡戲場果皆有續生天旱續生入泥塗偃展久之必雨土人謂之猪龍夜中有人見此市電火往視之有一蟒蛇身在電裏至曉見續生拂灰而出後不知所之

龜

趙清獻入蜀携一琴一鶴一龜今人都言琴鶴不言龜

廣東興寧縣金龜見長丈餘金光四射沂河而上
所過田陂皆壞其年嘉靖辛丑歲大稔

龜首俯者靈

蛇

有大蛇穴禹門下巖石中常束尾崖樹顛垂首于
河伺食魚鼈之類已而復上入穴如是者累年一
日復下食於河遂不卽起但尾束樹端牢不可脫
每其身一上下則樹爲起伏如弓張弛狀人之樹
枝披折蛇墮水中數日蛇浮死水旋隈竟不知蛇

得水物貪其腥羶不舍而墮刑抑蛇爲水之怪物
所得欲起不能而墮也是蛇負其險毒稔其貪婪
以食于河所恃以安者尾束于樹耳使樹不折則
其生死猶未可知惟樹折身墮遂死于河此殆天
理非偶然也且使蛇得水物貪其腥羶不舍而死
固可爲怙強貪不知止之戒使蛇爲水之怪物所
得而死亦可謂害物必報之戒

余家南潯東去舍數百步有舊窰土人馮姓者得
之毀其基中有蛇千餘俱縱之去大者數圍長十

丈一角往東行未幾馮一子暴死

萬曆丙戌建昌鄉民樵于山逢一巨蛇頭端一角六足如雞距見人不噬亦不驚民因呼羣往視亦不敢傷徐徐入深林去華山記云蛇六足者名曰肥蠃見則千里之內大旱戊子巳丑之災其兆已先見之矣

靳蛇一名塞鼻蛇諸蛇鼻向下獨此向上龍頭虎口黑質白花背有二十四方勝尾尖有一佛指甲腹旁有念珠斑剖之置水中則反尾滌其腹長尺

餘

乳羅山縣南三十里相傳一貨郎過此山得青卵
置之箱內脫殼爲蛇馴畜稍大復置之故處名其
蛇曰乳羅其後截道噬人甚厲衆覓貨郎使禁之
貨郎著刃于地叮嚀作念蛇引頸自刎而死
蛇一名曰蜀精

毒食

嶺南人慣食蛇云其味肥美萬曆間南海有諸生
數十人聚學宮見大蛇自梁間墜地取烹之將熟

忽報學憲至未及餐而出釜中溢汁流地二犬進
飲之皆死竈旁諸生歸大駭埋其肉階下數日出
一菌甚嫩學宮卒誤食之亦斃餘姚毛僉事患風
疾覓斚蛇酒飲之半月發腦疽遂不起晉中有人
採菌于木以爲天花菜也獻之某侍御食之盡一
器已入房臥次日不啓門役者倒門視之僅有白
骨在牀肉盡爲水矣因告令索菌木下得大蛇數
圍焚之煙觸人鼻咸斃或曰鼈與蛇同氣凡三足
者無裙者赤腹者白目者腹字者皆蛇產食之潰

體潮州有人取一巨鰐食之腹裂而死或曰亦蛇
化也有韓姓者園產一梨如斗大適諸客會飲剖
食之盡死一生獨不食得免使人掘梨下四蛇盤
焉東海林姓者園產大瓜客三人過食之入口皆
死主掘爪下有蛇如柱凡物異常者皆有毒匪直
異物古人曰厚味必腊毒

山海經曰鼈其多足三足鼈其多足傳曰三足鼈謂之
能不可食也山谿間多有之色赤

蝮蛇噬人必落齒舌虎豹食人必缺耳角自來獵

戶見缺耳之虎缺不過三人則何如矣不落不缺
越做越狠

魚

葛原六海門縣人魁梧豪俠以布衣詣闕下獻
鰣魚百尾時國初法嚴衆爲危之則笑曰爾不
上食父母耶君猶親也庸何傷及至高皇帝大
悅問之曰魚美何如蒲伏前頻首對曰魚美但臣
未進不敢嘗耳又大悅命大臣賜酒食仍選一
尾還之曰勞汝勞汝其後歲貢魚九十九尾著爲

令

閩閩十年有東夷人侵逼吳境吳王大驚令所司
點軍王乃宴會親行平明出城十里頓軍憇歇今
憇橋是也王曰進軍所司奏食時已至今臨頓吳
軍宴設之處今臨頓是也夷人聞王親征不敢敵
收軍入海據東洲沙上吳亦入海逐之據沙洲相
守一月屬時風濤糧不得度王焚香禱天言訖東
風大震水上見金色逼海而來遶吳王沙洲百匝
所司撈漉得魚食之美三軍踴躍夷人一魚不獲

遂獻寶物送降款吳王亦以禮報之仍將魚腹鴈
肚以鹹水淹之送與夷人因號逐夷夷亭之名昉
此吳王回軍會羣臣思海中所食魚問所餘何在
所司奏云竝曝乾吳王索之其味美因書美下著
魚是爲鰲字今從失非也魚出海中作金色不知
其名吳王見腦中有骨如白石號爲石首魚

其魚似黃魚而稍大本草和蓴作羹開胃益氣加
鹽暴乾食之名爲鰲土人愛重以爲益人雖產婦
在蓴亦可食炙食之主消瓜成水初出水能鳴夜

視有光頭中有石如碁子又野鴨頭中有石云是此魚所化

海魚以三四月間散子羣擁而來謂之黃魚因其色也漁人以筒測之其聲如雷初至者爲頭一水勢洶且猛不可捕須讓過二水方下網簇起潑以淡水卽定舉之如山不能盡水族之利無大于此者蓋散子旣有時必近海多山氣稍暖可倚以育若在溟濤中無所著如何生得此造化自然之奇而或謂內水衝出故魚至未必然

漢水中鰮魚甚美常禁人捕以槎頭斷水因謂之槎頭鰮宋張敬兒爲刺史齊高帝求此魚敬兒作六櫓船置魚而獻曰奉槎頭縮項鰮一千八百頭我郡有此魚以碧浪湖灰色者爲上蓋深潛土中得氣厚其它形相似而色白去之遠矣

冰井魚

臥冰得魚此王太保通神之孝乃王梅溪大父病思得鯽方盛暑不易致子釣于井得巨鱗梅溪年十一親見又奇矣

神魚

金山神魚每歲廟神誕日有魚名黑隘大者如山羣引海族來朝率午方退

周平二年十旬不雨遣祭天神俄而泉涌金魚躍出遂雨

進鮓

湖廣進魚鮓始于成化七年鎮守太監其初止二千五百斤十七年以後增至三萬斤用船十二隻皆布政司進獻弘治三年四月始命內官造辦如

七年數船止二隻 神廟三十年以進鮮粗惡奪
布政使程正誼官則又屬之有司而數之加增不
必言矣

雜物

有物如小龜土色雜灰土以居蠕動而步速好居
柱礎下或牆壁下鑽軟土下入畏雞食之生育亦
蕃至冬時穴土取驗之始見三時散居不知食何
物人傳能食白蠟至盡有李輔者經撫州金谿宿
饒臬大姓郭氏堂中地未潔乃遣從者淨掃之方

設榻主人再三戒且告以前物形狀曰吾家新創
室屋不意歲被白蠧傷食梁棟內空無如之何有
人教以往川中求此物寘于礎下灰土中今數年
來白蠧皆盡叩棟柱逢逢然了無一蠧存若令人
掃地上遇此物幸爲保全勿傷之夫能食白蠧必
奇物也亦蟲類大不盈寸塊然不動能鑽土而出
名曰蠧虎

余祖月溪翁云蟋蟀懼懼叫 宣德皇帝要蓋

宣廟有此好采之江南者蘇太守況鍾被敕索千箇

不許違誤此宣德九年七月事也

沮洳之區素多蚊蠹五六月間舟中蚊盛不可宿
但每至高郵望見泰山則蚊悉自舟中飛出無留
影者相傳呂祖有煉陽菴在泰山之陽或有僊氣
驅之故如此蓋屢驗云

凡蜂聚人家者多不和其採蜜者不與焉王莽時
九江連率賈萌守郡不降有飛蜂附萌車爲漢兵
所誅晉陶侃表袁謙爲高涼太守未至百餘里浦
中有蜂蔽日下謙船已而皆不利近則南中黃侍

郎見第十二卷

卷之三

楊邃菴致政歸一日遊鎮江北固山偶見群蜂擁蜂王出遊遇鷲鳥擢蜂王殺之群蜂環守不去數日俱死之邃菴瘞焉表其封曰義蜂塚親作文祭之未幾有蜂十餘隊約可數萬繞公廳事首皆內向飛鳴良久始去蓋蜂王之族感而來謝也

蛭蛭卽今俗語所謂沿油也一名托胎蟲能制蜈蚣

蛭蛭

紹興郡丞張公佐治罷金華守去郡至一處見蜎
蜎無數夾道鳴噪皆昂首若有訴異之下輿步視
而蜎蜎皆跳踴爲前導至田間三屍疊焉公有力
手挈二屍起其下一屍微動湯灌之遂巡間復活
曰我商也道見二人肩雨筐適市皆蜎蜎也意傷
之購以放生二人復曰此皆淺水雖放人必復獲
前有清澗乃放生池也我從之至此不虞揮斧遂
被害二僕隨後尚遠有腰纏必誘至此并殺而奪
金也丞命急捕之人金皆得以屬其守石公崑玉

一訊皆吐實抵死腰纏歸商張閩人石楚人皆有
清名石之子有恒已未進士自淳安調長興蘇人
請之調常熟

父原蘇州太守

長興人又爭之得止

物理

麻敗酒蟹敗漆金得伯勞之血則昏鐵得鸛鷀之
膏則瑩石得鵲髓則化銀得雉糞則枯風生獸得
菖蒲則死鼈得莧則活蜈蚣得蜘蛛溺則腐鴟鴞
得桑椹則醉貓得薄荷則醉虎得狗則醉橘得精
則爛芙蓉得油則敗番蕉得鐵則茂金得翡翠則

粉犀得人氣則破人食磐石則死蠶食之則不飢
魚食巴莖則死鼠食之則肥護草忘憂合歡獨忿
倉庚已妒鵲鴝治魘索邈治畏金剛石遇羚羊角
則碎水怪遇犀則不隱石鼓遇桐材則鳴龍鰲遇
煙煤則不散

狼倒草以卜虎圻地以筮鶴禹步鴈畫印獺祭圖
豺祭方蛇蟠向于鵲巢而歲燕伏戊巳蝠伏庚申
虎奮衝破倉庚知春分伯勞知夏至度鵲知來程
猩知往拂拂自知死生虎識字角端知四夷之語

象知地之虛實橐駝知泉脉之所在魚伯識水旱
之氣蜉蝣曉潛泉之地鵲知風之高下獬廌知人
之邪正鸛鵒向日而飛玄鰩向斗以遊兔恒向月
而息鵲髡于七夕海扇見乎上巳鵲鳴羸于孟冬
短狐上弩于孟夏之朔蜉蝣群死于白露之朝數
九之蟲九土三百而潮至移風之雞鷩潮至而輒
鳴烏鳳曉百蟲之音反舌解百鳥之語風狸遇風
則行空橐駝遇瘴風則埋其鼻獬廌將風則踊置將
雨則鳴鵲將風則啼商羊將雨則起舞鳩暮鳴則

雨鳶朝鳴則風蛤暈隨潮以數其文獺肝隨月以生葉

食品以鷺爲重故 祖制御史不許食鷺今東南大家以鷺乃發氣之物俱斥不用唐制御史不許食肉

蟹入海至春散子卽枯瘠死矣

蚌無牝牡爲雀鵠所化故久者生珠專一千陰也